

欽定剿平粵匪方略

欽定剿平粵匪方略卷八十九 甲寅年

四月初六日

甲戌

兵部右侍郎王茂蔭奏言查徽

郡與浙省相錯距廬最遠陸路旣極崎嶇水路  
又不與江通而與浙通故自來安徽省皆食淮鹽  
而徽郡獨食浙鹽蓋前人之因地制宜已如此  
本年正月匪徒攻擾祁黟劫財物擄民人其勢  
方熾一聞浙省援兵將至相率退去是徽州有

事本省救援不及必賴浙省救之且徽處浙上游爲浙西門戶若有疏虞順流以達於杭實有建瓴之勢徽境皆崇山峻嶺足可控扼能保徽州卽能保浙况蘇杭素稱富庶久爲逆匪覬覦其所以不卽攻擾者以常鎮一路有向榮扼之上年擾及饒州本年擾及祁夥未必非窺伺浙省之意爲今之計似宜稍爲變通以徽郡暫歸

浙江統轄緩急相援可以藉浙之力保徽亦可藉徽之力保浙唇齒相依庶期得力奏入

上命軍機大臣傳諭黃宗漢曰徽州據浙江上游爲浙西屏蔽前次皖賊攻陷祁門竄赴黟縣並聲言欲至屯溪經黃宗漢添派兵勇分路防堵祁黟賊匪旋即聞風退竄茲據王茂蔭奏稱徽浙有唇齒相依之勢保徽卽以保浙並因徽郡距廬郡寫遠江路不通恐

皖省控馭不及欲請暫歸浙省管轄雖係因時制宜惟地勢情形仍須詳加體察現在該逆雖暫舍祁黟而去亦恐復來竄撲黃宗漢前於嚴衢各屬節節設防刻下徽郡有無賊蹤著飭令該府達秀等隨時偵探飛速稟報遇有警急卽著迅飭前派之將弁兵勇等出境進剿總以外援鄰封內保本境爲第一要著其防剿一切事宜諒該撫自能籌畫萬全也

同日崇恩奏言現准江蘇巡撫許乃釗咨稱探  
得南股賊匪共計三起竄入永城有偽丞相三  
人統之約計共有五六萬人已入蕭場境內勢  
極囂張並據蕭縣獲到奸細供稱已在黃家口  
東南築挖土城土濠南面偏近郡城北面聲息  
隔絕偷渡竄擾在在可虞奏入

上命軍機大臣傳諭崇恩曰據奏接許乃釗咨稱南股

賊匪五六萬人已入蕭楊境內屯聚日內並未據徐州等處奏報是否卽係前此豐工渡河之匪抑係另股續來者著該撫迅速確查具奏

初七日乙亥勝保奏言賊匪竄入清水集後於三

月二十九日初更時假冒官軍傾巢撲出經臣飭令黑龍江吉林營總那爾胡善台祿托克通阿等分兩翼抄截登時斃賊二百餘名旋見該

逆又分二股一撲善祿之營一撲桂明之營經  
善祿督兵迎擊斃賊甚多其桂明之營距賊較  
近帳房車馬亦被焚燒經臣飛淚侍衛克興阿  
佐領常林帶領馬隊馳往接應斃賊一百餘名  
餘賊狂奔回巢黎明時復全股撲出臣仍督馬  
隊分兩翼抄截合力奮擊斃賊無數初一日督  
兵進攻賊巢並用二千斤大礮及神威礮向賊



巢轟擊該逆不能安身於初二日丑刻向南全  
股奔竄臣於丑刻整隊密探並親督馬隊緊追  
善祿督步隊亦卽前進天將明時見賊衆綿亙  
數里當令馬隊分三路馳往奮擊吉林營總台  
祿帶兵由北勦殺副都統魁福帶兵由南抄殺  
臣督兵由中路一齊吶喊衝入賊隊賊衆自相  
踐踏分股亂竄我兵亦分投截殺該逆旋竄入

孝頭谷等六村莊臣先令侍衛蘊秀遊擊穆隆  
阿帶馬隊分路抄圍時善祿督催步兵亦至同  
時縱火焚燒奮力躍入賊衆自亂各村先後齊  
破統計此次殲斃逆匪五六千名逃出生擒者  
千餘名其餘零匪南奔冠縣臣已令魁福管帶  
馬隊千餘名馳往截剿查冠縣前次失守後被  
賊蹂躪城中居民早已逃亡此時城池似已不

能再踞 臣將各村餘匪搜盡督兵已抵冠縣審  
度情形該逆如果踞守冠縣 臣自當設法圍剿  
以期就地殲除

勝保又奏言 臣追賊至清水集紮營逼近賊巢  
相距僅及一里因一時無從雇覓人夫澆築濠  
牆是以僅止列隊未能紮營以致該逆暗用奸  
細拋入火彈焚燒帳房車輛並延燒火藥數篋

黑暗之中火光忽起後隊官兵及隨營糧臺有  
退至數十里之外者卽在營將弁兵丁見賊乘  
火撲來亦多心慌意亂若非臣處以鎮定親督  
馬隊將賊奮擊回巢則全軍爲之一驚幾至失  
利此次營帳雖被焚燒而士氣未挫惟究屬臨  
心實難辭咎請

旨將臣及提督桂明一併交部議處奏入

上諭曰前隊有警後隊不但不救轉退至數十里之外  
各不相顧何怪乎總未成功著查明先退者正法數  
人以儆其餘汝從前軍法尙嚴何厯練日久頓易初  
心豈有所回護恐人挾制不敢振作耶朕並非疑汝  
汝可返躬自問有則速改

上命軍機大臣傳諭勝保曰此次逆賊假冒官軍鄉勇  
焚燒帳房車輛並延燒火藥何以事前毫無覺察如

果步伍嚴整奸細何由得入軍營重地豈可昏夜稍弛防閑想彼時擾亂情形幾欲貽誤大局焉知不由該大臣屢次戰勝心高意滿有此疏虞若僅將勝保桂明議處了事轉足以釋該大臣等疏失之愆而無以見朕諄諄訓誡速望成功之意且初一二日追勦逆賊奪回各村亦尙勇往勝保等姑免置議著將南竄冠縣之餘賊盡數殲擒該大臣旣令魁福馳往截

剿能否不令該逆占踞縣城何以既稱該逆不能再  
踞復稱如果踞守自當設法圍剿可見魁福之能繞  
出賊前與否該大臣尙無把握該處緊接大名果係  
縣城空虛逆賊無所繫戀尤防其西竄直境復爲北  
犯之計仍與阜城賊匪會合該大臣應卽飛飭張殿  
元等一面嚴守要隘一面督兵迎擊與大軍合力夾  
攻較易得手該大臣仍不得任令該逆肆意南奔一

味尾追縱有斬擒而餘賊愈竄愈南官軍愈追愈遠  
北路之援應不靈南賊之勾結更易大勢轉爲牽掣  
何以迅就肅清仍著該大臣速將冠縣境內逆匪剋  
日掃蕩淨盡朕方懸賞以待正不必先予議處也勉  
之懷之

上又命軍機大臣傳諭百勝王夢齡曰昨據崇恩奏逆  
匪分三股陸續北竄或卽係前次渡河及由永城折



回六安之賊本日又據勝保奏稱訊據賊供並拏獲  
逆信果有囑令後隊渡黃多帶火藥口糧來北接應  
之語是北賊之情急求救南賊之希圖續渡已屬顯  
然儻堵禦再有疏虞復致墮賊聲東擊西奸計直以  
天險要隘棄之不扼任令逆蹤南北衝突復肆狼狽  
該鎮道等有心玩視一誤再誤罪豈容誅著百勝王  
夢齡於接奉此旨後迅速認真籌辦一面飛探賊蹤

相機迎勦一面嚴扼險隘使之無隙可乘仍與秦定  
三袁甲三隨時知照聯絡聲援先事防備卽將布置  
情形隨時由驛馳奏總之此股北竄逆匪該鎮道旣  
疏防於前若南匪復有偷渡情事朕惟有治百勝王  
夢齡以貽誤之罪

同日台湧奏言查賊撲德安郡縣相繼失守兵  
勇潰散實堪憤恨此次派往應山各兵勇除佈

克慎將聞賊先逃者手刃三人外其餘尙有九  
百餘名迄今杳無蹤跡臣現已行飭各原營地  
方及各府州縣一體盤拏無論何處查獲卽行  
就地正法以昭炯戒其失守之府縣文武員弁  
尙無下落應俟將來收復城池後彙查確實再  
行分別辦理奏入

上諭曰府縣失守城池各文武除不知下落外其猶生

者豈能晏然無事並不叅辦著迅查真情不准任其捏飾正法數人或概予正法亦無不可

同日

上命軍機大臣傳諭僧格林沁曰本日玉明等回京呈遞阜城軍營形勢地圖朕詳加披覽布置尙爲周密賊匪自初一日被地雷轟敗初二日復因撲濠被勦後連日作何情狀曾否出撲此時誘賊離巢痛加勦

洗固爲要策但據玉明等面奏僧格林沁曾帶親兵  
數人輕騎誘賊爲賊匪大股抄圍勢甚危急大兵隨  
後趕到始獲全勝按之該大臣二十六日所發奏報  
情節適合該大臣因逆匪堅匿不出急欲圖功輕於  
一試固屬不得已之苦衷惟統帥爲一軍之主國體  
攸關非如偏裨將弁專以衝鋒陷陣爲功前此該大  
臣在王慶地時輕騎前往天津朕卽有硃批詳示並

非教以畏葸輕敵冒險究非統帥所宜該大臣務當督飭將士將阜城賊匪設計殄除於勇往之中仍寓持重之意庶免朕心懸繫至圖內所繪阜城東面紮有董占元營盤該革員前在懷慶打仗卽不甚得力數月以來直隸軍報從未敘及該革員隨同打仗究係何時留於該大臣軍營是否尙堪驅策著卽認真察看毋稍遷就現在山東逆匪經勝保連日追殺竄

往冠縣一帶所餘之賊不過數千冠縣與大名接壤  
已諭勝保嚴飭張殿元達年實力堵剿防其西竄惟  
擒獲生賊搜出阜城逆匪書信仍有催其迅速救援  
之語是阜城一日不靖賊心一日不死儘再有續來  
逆匪勢必又肆鴟張僧格林沁固不可恃勇輕進亦  
不可專恃長圍致延時日也

同日

上命軍機大臣傳諭文謙曰前因天津紳勇於上年九月閒保守城池出力曾降旨將在事之文武員弁紳民兵勇等分別獎敘復諭文謙等將其餘各員弁及出力之紳董商民俟事竣再行請獎迄今已逾數月聞該郡各紳勇於逆匪竄踞獨流時每幫同官兵打仗其中奮勇殺賊赴義捐軀者頗不乏人並聞該處附城紳董多出資募勇晝夜嚴防使逆衆不能乘間



關入實屬同心敵愾奮勉堪嘉著文謙卽遵照前旨  
將未經保奏之出力官紳兵民等迅速查明奏請恩  
施以昭激勸並將節次陣亡各勇按名詳查咨部議  
卹以慰忠魂現在阜城之賊尙未殲除淨盡天津爲  
近畿重地仍著文謙等諄勸各紳民認真團練保衛  
鄉閭並飭令所屬各縣一律辦團儘能始終奮勉衆  
志成城朕必將該郡紳民優加獎勵正無慮勞績不

能上達也

初八日

丙子

僧格林沁西凌阿托明阿奏言近日

狂風大作塵沙飛揚臣等因恐出隊輕進致誤  
事機嚴飭各營不分晝夜巡守長圍以防潰突  
初四日夜該逆撲近濠邊我兵槍礮齊施追至  
埋有地雷處所被轟逃回初六日子刻該逆復  
趁風勢向東南培成營盤捨命豕突該處與烏

凌額防所相連雖經培成烏凌額等極力抵禦  
竟被撲出重濠順風拋擲火彈噴筒將培成等  
營內帳房焚燒培成督兵奮擊未容竄潰臣一  
聞逆匪竄出立即催調各營馬隊趕至該處合  
力截殺我兵奮勇直前殲殄逆匪無數該逆退  
至濠邊死拒不回我兵總未容其突出此時惟  
有俟狂飆暫息或不致僨事蕝此垂成之功

設竟不能兜攔臣等立即前截後追亦不敢任其遠颺至培成等營盤失挫任賊突出雖因風勢太狂人力難施究屬堵守不力相應請

旨將侍郎培成摘去頂戴責令立功以贖愆尤副都統烏凌額亦有應得之咎惟是日進攻頭受槍傷請從寬免議臣僧格林沁統率無方以致官兵營盤挫失應請一併議處奏入

上命軍機大臣傳諭僧格林沁曰阜城軍營濠牆樹柵層層布置已有月餘之久何以逆匪撲出竟無攔阻致令焚燒營盤直抵濠外抗拒不回是連日安設長圍全不得力其防守官兵所司何事實堪痛恨今該逆死踞濠邊雖未全竄已在長圍之外防堵愈難且該逆屢出竄撲皆向東南一帶顯係欲從景州德州等處潰逸與南來之賊勾結現在臨清賊蹤雖已漸

遠仍在冠縣境內距直隸大名甚近若向東南竄出  
由景州故城循運河而南便可合爲一股即使我軍  
能向東南力截又恐大兵全聚一隅該逆窺我他處  
空虛陽撲東南潛向東西北三面突圍衝撲尤爲可  
慮僧格林沁不能迅速奏功轉以人力難施爲解看  
其光景直似束手無策若不能將撲出之賊全數截  
回極力殲戮致令稍有疏虞朕自能將僧格林沁從

重治罪不僅以議處了事所稱前截後追不任遠颺等語亦係毫無把握之事總以就地殲滅爲要至此次撲出賊衆是否係阜城內外全股突出抑城關兩村仍有賊匪聚伏我兵以全力扼其東南設該逆窺我空虛處所分投奔突轉致我兵疲於接應又墮賊聲東擊西之計該大臣務當通籌布置毋稍大意

上又命軍機大臣傳諭勝保崇恩曰阜城逆匪被圍日

久窮感思竄冀圖與南賊會合現既大股向東南衝  
撲雖經兵力截擊仍復退至濠邊死拒不回萬一防  
勦稍疏該逆必致伺隙南奔其由景德二州折而西  
南至臨清冠縣不過數百里之遙一經奔突勾結勢  
必復肆鴟張而勝保一軍轉有腹背受敵之患冠縣  
逆眾不過六七千人若此股迅就殄滅卽移得勝之  
師向北迎截庶勦辦可期得力該大臣務卽速籌南



北兼顧全策先將現辦之賊聚殲淨盡免致稽延時  
日並如何堵截北路竄匪以剿爲防總期計出萬全  
毋墮該逆聲東擊西奸計崇恩身膺疆寄現駐臨清  
距直境較近若阜城之匪竟致突圍而出該撫帶兵  
迎擊亦甚便捷儘敢畏縮不前或藉詞株守一隅朕  
必治該撫以貽誤軍情之罪其由慶雲鹽山至山東  
武定並清河大名與山東交界處所均著崇恩嚴飭

各該地方文武實力籌防如守土之官仍前玩誤卽著隨時嚴叅懲辦從重治罪

上又命軍機大臣傳諭桂良曰阜城賊匪大股衝突重濠向東南培成營盤拋擲火彈將營內帳房焚燒勢甚猖獗雖經僧格林沁等督兵堵截現在死拒濠邊尙未回巢難保不四出紛竄該處東通連鎮北達獻縣東南與景州西南與武邑衡水均屬壤地毗連最

關緊要著桂良嚴飭各該地方文武員弁嚴密防範  
斷不可令賊蹤乘間闖入至臨清餘匪昨據勝保奏  
現已竄至冠縣又經官兵殲戮甚多亦須防其竄入  
大名等處著該督仍飭令張殿元懷遵前旨盡力截  
扼或酌量帶兵出境迎擊不得專事防守仍著桂良  
與僧格林沁勝保載齡等互相知照並多設偵探將  
界連阜城各地方情形隨時迅速奏報

上諭內閣曰阜城賊匪久經官兵圍剿窮蹙思竄於初六日夜間乘風撲出重濠向培成等營盤拋擲火彈噴筒焚燒帳房雖經僧格林沁催調各營馬隊合力截擊斃賊無數該匪死拒濠邊尙未竄出實屬防範不力培成著摘去頂戴烏凌額因擊賊受傷免其置議僧格林沁未能先事豫防著傳旨嚴行申飭仍著該大臣督飭各路官軍盡力圍剿務將此股逆匪悉

數殲除毋任竄逸

初九日

丁丑

勝保奏言逆賊竄踞冠縣將西北關

廂及附城村莊占踞臣督兵進攻奮勇抄殺斃

賊二百餘名訊獲賊供該逆有回南逃命之語

臣以賊若窮竄步隊萬難趕上當囑善祿督押

後隊官兵臣督帶馬隊緊追該逆於初三日亥

刻乘夜向僻路奔竄其後隊賊匪暫留冠縣牽

掣我兵惟爲數無多經善祿督飭官兵擊殺淨  
盡賊分股竄至張秋鄆城一帶臣督令魁福等  
分路截殺賊衆奔潰我兵槍箭齊施奮力追截  
殺賊四五百名該逆沿途拋棄器械米麩無數  
伏匿附近各村莊抵死抗拒我兵併力擊殺復  
乘風縱火燒燬各村莊斃匪不計其數餘匪冒  
火突出奔上梁山復經官兵追殺殲斃數百名

四散逃命及棄械投出者不下千人臣仍親督馬隊乘夜馳往追殺總以殄滅爲期奏入

上命軍機大臣傳諭勝保曰此股逆匪屢經我兵追擊所餘不過四五千入其勢已極窮蹙惟由冠縣莘縣及陽穀一路竄赴梁山復由梁山南竄賊勢剽疾異常必須乘其喘息未定奮力窮追尤應派員管帶馬隊設法繞出賊前兩路夾擊庶可聚而殲旃若徒事

尾追轉恐該逆沿途裹脅逆燄復張或占踞村鎮又  
成負嵎之勢著勝保卽督飭馬步各隊迅速追剿總  
期四面兜圍爲一鼓蕩平之計逆匪由梁山南竄究  
竟欲往何處著該大臣迅卽確探賊蹤痛加剿洗至  
投誠裹脅之衆該大臣擇其有技勇者留於軍營效  
力自爲解散賊勢起見然必須加意防範前次勝保  
及桂明營盤被焚安知不有此等奸匪內外勾結賊



情詭詐異常務當慎密周防不可因屢獲勝仗稍涉大意

上又命軍機大臣傳諭崇恩曰前有旨令崇恩查探何路緊急卽往何路剿捕或赴勝保軍營協剿不得株守臨清誠以該撫統轄全省賊匪尙在東境自應統籌兼顧藩司厲恩官與知州黃良楷駐紮東昌東南一路務卽酌量情形嚴飭該員等分兵截剿濟甯爲

水陸要衝該處團練甚多尤須分布要隘防賊紛竄  
不得以有勝保等在前勦賊稍存諉卸

上又命軍機大臣傳諭百勝王夢齡曰逆賊由冠縣竄  
出復由鄆城縣之梁山地方南竄此股賊匪經勝保  
等督帶官兵跟蹤追勦勢窮力竭必至南向狂奔儘  
有續來股匪又將勾結爲患徐州東省交界百勝等  
統兵防堵當一面力扼河岸不可使南來賊匪乘間

偷渡一面仍當確探北路賊蹤如勝保等追擊漸近  
卽著提兵前進與勝保等合力兜剿儘南匪或有偷  
渡北匪竄至該處境內並無官兵攔阻截剿朕惟百  
勝等是問

同日琦善奏言連日由三汊河東西兩岸進剿  
殲斃賊匪數名及數十名不等四月初一日賊  
匪百餘人出土城拒戰官兵施放連環槍礮斃

賊數十名叅將鞠殿華等由東岸進勦直抵賊  
濠斃賊數名至江中賊船往來靡定疊經武慶  
等破之於浦口等處現據獲賊供稱逆賊欲用  
鐵鎖橫江以阻舟師艇師各船協力防勦候風  
修船動輒經旬臣已嚴飭趕辦卽日上駛查統  
帶艇師各船雖有總兵四員而蘇松鎮葉常春  
署狼山鎮李德麟均係革職留任温州鎮陳世

忠係革職留營署定海鎮周士法係遊擊護理  
兼之葉常春近又多病在營水師將領亦少出  
色人員設有更換無人可委相應請

旨飭下閩浙總督於水師副將以下各官中遴派數員  
迅速前來幫同管帶戰船聽候差委奏入

上命軍機大臣傳諭琦善曰此次官兵由三汊河東西  
兩岸分路進剿仍不過小有斬獲該逆一經挫敗卽

堅拒不出似此曠日持久以蕞爾瓜州竟不能出奇制勝力破賊巢該大臣貽誤遷延罪將誰諉至浦口六合兩處屢有賊船駛至甚至登岸焚掠雖經官兵擊退而該逆狡獪異常必仍思乘隙肆擾該大臣務當嚴飭武慶等實力防勦不可稍涉大意水師艇船專爲肅清江面前此駛至黃天蕩頗爲得手正可乘機上駛將江面賊船盡數掃除豈可藉口於候風修

皇朝通志卷之二十一  
三三

總致誤事機七號口以上賊以鐵練攔截此等伎倆豈能阻我舟師細閱該大臣所奏於瓜州則云賊匿不出於江浦則謂防不勝防勦辦事宜毫無把握試思該大臣統領諸軍在揚已逾一載老師糜餉日久無功若再事遷延不知振作朕惟執法從事不能屢邀寬典也

上又命軍機大臣傳諭王懿德黃宗漢葉名琛柏貴曰

江南賊船在瓜州一帶江面游駛經琦善督飭水師  
鎮將於老河影沙漫洲等處屢加攻勦正當喫緊之  
際著王懿德黃宗漢葉名琛柏貴迅卽於閩浙廣東  
水師副將以下各官內遴選數員飭赴揚州琦善軍  
營聽候調遣前據葉名琛等奏飭委總兵謝焜督同  
署副將梁顯揚統帶拖風船吳全美陳國泰督帶紅  
單船前往江南諒早起行仍須於此數員外另揀得



力數人迅飭前赴揚州不得以無員可撥藉詞推諉  
同日和春福濟奏言廬州逆匪自臣等移營後  
節次督率官兵奮力攻勦奪獲賊營多座燒燬  
賊巢十餘處先後斬擒不下四五千名三月十  
五日該逆於北門添築營壘我軍奮勇爭先立  
將賊營三座同時奪獲接仗六時之久斬擒甚  
衆洵屬大振軍威自應乘勝奪取城垣經臣等

連日派兵各帶雲梯出其不意三面圍攻乃官兵將及城根該逆已有準備我軍攻擊多時逆匪槍礮頻施未能得手現在已飭各營移紮河邊偏近賊巢設法圍攻以圖克復奏入

上諭曰惟有切盼捷音之至雖廬城克復安慶等府縣猶須費手恐克復廬郡亦祇空言儻卽日克復撫恤一切固應急辦然到處皆賊福濟斷不能安坐省垣

和春福濟又奏言遵

旨飭派秦定三馳赴正陽關督率官兵扼要堵剿以遏  
逆匪北竄奏入報

聞

初十日

戊寅

向榮奏言金陵逆匪屢出窺伺礮臺

臣令將大礮對準朝陽門日夜轟擊所有城頭  
當面望樓瞭棚擊毀一空二十一日臣復親督

隊伍至礮臺察看形勢適東風大作可用火攻  
因令勁兵槍撲賊營施放火箭噴筒該逆抵死  
不出復查聚寶門外雨花臺屯聚賊壘數處二  
十五日二更後傳令前往襲攻詎該逆防守甚  
密哨見兵勇潛來遂卽鳴角相應城上大礮與  
賊壘槍銃一時併發我軍仍冒險攻撲施放火  
具黑夜未知賊斃多少攻至天明賊匪愈集因

恐該逆抄我後路隨卽撤退其進攻太平朝陽  
兩門之兵亦未得手祇可相機另籌攻取至鎮  
營當蘇常門戶堵剿尤爲緊急業經臣抽撥廣  
東壯勇五百名赴鎮助剿力圖克復奏入

上命軍機大臣傳諭向榮曰本日閱該大臣所奏仍不  
過敷衍塞責於攻剿各情毫無把握至進攻鎮江亦  
未能卽時克復城池向榮統領全軍攻剿逆匪是其

專責乃屯兵日久師老餉糜不能出奇制勝埽穴擒渠似此觀望遷延自問當得何罪江南勦賊必須力扼長江爲水陸夾攻之計廣東所備船礮昨已諭令琦善派員迎提爲攻勦瓜州之舉此項船隻專爲肅清江面而設該大臣與琦善分勦江南江北所辦實係一事况江路一通使南北之賊聲勢不能聯絡則該大臣等勦辦均可得手所有廣東各船並著向榮

與琦善會商飛速分提以資攻勦湖南舟師一時不能駛赴下游該大臣惟當就現在兵勇並飛催前調之閩廣官兵迅速設法籌勦一面嚴飭余萬清督率弁兵剋日收復鎮江毋得株待湖南船礮致誤事機同日崇綸青麀奏言該逆現踞漢陽漢口一帶沿江設立木椿三層高約丈餘復築土牆一重意在專困省城臣等覩此情形日夜焦灼此時

江水正漲兵力既單又無船隻可渡經臣崇綸  
委員四處搜覓僅得小划二百餘隻加以礮船  
百餘隻商令設法進攻旋經已革總兵楊昌泗  
等在塘角江岸等處督戰二十一日自丑至巳  
鏖戰四時之久斃賊甚多維時攻勦漢口南岸  
之兵勇已冒雨直抵北岸將該逆大小船隻用  
水隊包裹該逆情急投江者不計其數惟該逆



沿江一帶木椿數層十有餘里木椿以內全是  
陷坑泥滑不能登岸旋卽收隊此次勦賊獲勝  
出力弁兵可否量予鼓勵之處出自

逾格恩施奏八

上諭曰此次並非大勝何必如是鋪張出力人員姑念  
其處於賊中處處棘手尙能小有斬擒且固守多日  
省垣暫可無虞著准其擇尤保奏數員以示獎勵

青廉又奏言探聞德安府已於初十日被賊占踞該府所屬之雲夢應城應山均爲賊踞臣前在德安起程時曾面向台湧商及一時調兵不及祇可將城外附近之勇暫爲紮營一俟有警再將各勇招集詎臣起程未及三日已將各勇裁撤以致漢陽黃德等府蹂躪不堪臣甫經莅任又值省垣被圍已逾兩月外援不至內餉已

虛當此時勢乖舛萬分棘手之際除設法偵探  
再行奏報外不敢不豫爲陳明奏入

上諭曰德郡之失固台湧之罪然潰散情形出乎意外  
汝在彼時幸賊未至設該逆已撲德安汝豈能守現  
雖憤惋已無及矣汝摺云不敢不豫爲陳明太不成  
話不過希冀免處分起見亦覺小器朕非臆度於事  
後實時勢所必然也

同日駱秉章會國藩奏言逆賊自二月由水路  
上竄湖南被兵勇擊退茲復糾聚醜類水陸並  
進大舉南犯賊船數千號分泊長沙之靖港湘  
陰之樟樹港等處距省城數十里陸路之賊由  
靖港取道甯鄉直趨湘潭臣等現派兵勇馳赴  
湘潭相機攻勦仍留水路四營扼紮下游以遏  
其上竄之路奏入

上命軍機大臣傳諭駱秉章曾國藩曰賊匪前由湖北復擾岳州陸路官兵失利曾國藩遽率水勇礮船回省守禦疊次諭令與駱秉章熟籌防勦相機進攻不得株守長沙原以楚北賊勢猖獗肅清江面專恃南省水軍茲據奏稱該逆水陸並進大舉南犯賊船數千號分泊靖港樟樹港等處距省數十里陸路之賊由靖港取道甯鄉直趨湘潭是該逆已繞越省城何

以毫無阻隔曾國藩所帶鐵船練勇甚多何以未經  
與賊接仗胡林翼塔齊布所帶各兵現在何處勦賊  
該撫前調江忠濟募勇赴援並添調辰州官兵計日  
約可到省且鎮筸鎮標兵丁素稱勁旅並辰沅道所  
轄屯兵亦可酌調來省著駱秉章曾國藩卽就本省  
弁兵設法布置迅掃賊氛